

VENDIM
Nr.1096, datë 2.7.2008

PËR DISA NDRYSHIME DHE SHTESA NË VENDIMIN NR.438, DATË 13.7.2007 TË
KËSHILLIT TË MINISTRAVE “PËR PAGAT E PUNONJËSVE TË POLICISË SË
MBROJTJES NGA ZJARRI DHE SHPËTIMIT”

Në mbështetje të nenit 100 të Kushtetutës, të nenit 35 të ligjit nr.8766, datë 5.4.2001 “Për mbrojtjen nga zjarri dhe për shpëtimin”, të nenit 5/1 të ligjit nr.8487, datë 13.5.1999 “Për kompetencat për caktimin e pagave të punës”, të ndryshuar, dhe të ligjit nr.9836, datë 26.11.2007 “Për Buxhetin e Shtetit të vitit 2008”, të ndryshuar, me propozimin e Ministrit të Brendshëm dhe të Ministrit të Financave, Këshilli i Ministrave

VENDOSI:

1. Në vendimin nr.438, datë 13.7.2007 të Këshillit të Ministrave, të bëhen ndryshimet dhe shtesat e mëposhtme:

a) Lidhja nr.1 “Struktura dhe nivelet e pagave për punonjësit e Policisë së Mbrojtjes nga Zjarri dhe Shpëtimit”, e përmendur në pikën 1, zëvendësohet me lidhjen me të njëjtin numër dhe titull, që i bashkëlidhet këtij vendimi dhe është pjesë përbërëse e tij.

b) Pas pikës 3 shtohet pika 4, me këtë përmbajtje:

“4. Specialistët, përgjegjësit e sektorit apo drejtorët në Policinë e Mbrojtjes nga Zjarri dhe Shpëtimit, që punojnë në pozicione, që lidhen me procesin e informatizimit të veprimtarisë së kësaj policie, për të cilat është i detyrueshëm arsimi i lartë, në degët “Inxhinieri elektronike” apo “Informatikë”, përfitojnë një shtesë, për kushte pune, 10 000 (dhjetë mijë) lekë mbi pagën mujore të gradës përkatëse. Zbatimi i kësaj shtese bëhet pas miratimit paraprak të Departamentit të Administratës Publike dhe Ministrisë së Financave, sipas parashikimit të pozicioneve të punës.”.

c) Pikat 4, 5 e 6 numërtohen, përkatësisht, 5, 6 e 7.

2. Efektet financiare, që rrjedhin nga zbatimi i këtij vendimi, të përballohen nga fondet buxhetore të planifikuara për rritjen e pagave, për vitin 2008.

3. Ngarkohen Ministria e Brendshme dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare dhe i shtrin efektet financiare nga data 1 korrik 2008.

KRYEMINISTRI
Sali Berisha

LIDHJA NR.1

STRUKTURA DHE NIVELET E PAGAVE PËR PUNONJËSIT E POLICISË SË
MBROJTJES NGA ZJARRI DHE SHPËTIMIT

Roli	Grada	Paga bazë për gradë	Shtesa për natyrë të veçantë pune e shërbimi
1	2	3	4
Bazë	Agjent	33 000	7000
	Agjent i I-rë	34 500	7000
	Asistent	36 000	8000
	Asistent i I-rë	38 000	8000
	Kryeasistent	40 000	8000
I mesëm	Nëninspektor	46 000	6000
	Inspektor	49 000	6000

	Kryeinspektor	56 000	6000
I lartë	Nënkomisar	66 500	6000
	Komisar	82 000	6000
	Kryekomisar	94 000	6000
Madhor	Drejtues	105 000	
	Drejtues i I-rë	115 000	